

元和郡縣圖志



中國古代地理總志叢刊



中國古代地理總志叢刊

元和郡縣圖志

下
〔唐〕李吉

中華書局

元和郡縣圖志卷第二十五

江南道一

浙西觀察使

潤州，丹陽。上。開元戶九萬一千六百三十五。鄉一百。元和戶五萬五千四百。鄉八十。

管田六千七百二十七頃。(一)今爲浙西觀察使理所。

管州六：潤州，常州，蘇州，杭州，湖州，睦州。縣三十七。都管戶三十一萬三千七百

七十二。

墾田五萬七千九百三十二頃。

本春秋吳之朱方邑，始皇改爲丹徒。漢初爲荆國，劉賈所封。(三)後漢獻帝建安十四年，孫權自吳理丹徒，號曰「京城」，今州是也。十六年遷都建業，以此爲京口鎮。按州理或古名京城，說者以爲荆王劉賈嘗都之，或曰孫權居之，故名京城。今按「荆」字既不同，又孫權未稱尊號已名爲「京」，則兩說皆非也。按京者，人力所爲，絕高丘也。亦有非人力所爲者。人力所爲者，若公孫瓚所築易京是也；非人力所爲者，滎陽京索是也。今地名徐陵，卽

此京非人力所爲也。京上郡城，城前浦口，卽是京口。吳志曰：漢獻帝興平二年，長沙桓王孫策創業江東，使將軍孫何領兵屯京地，是也。吳志又云：魏將臧霸以輕船五百，敢死萬人襲徐陵，攻燒城塹，卽吳時或稱京城，或稱徐陵，或稱丹徒，其實一也。晉永嘉亂後，幽、冀、青、并、兗五州流人過江者，多僑居此處，吳、晉以後，皆爲重鎮。晉咸和中，郗鑒自廣陵鎮於此，爲僑徐州理所。昇平二年，徐州刺史北鎮下邳，京口常有留局，後徐州寄理建業，又爲南兗州，後又爲南徐州。隋開皇九年，賀若弼自廣陵來襲，陷之，遂滅陳，廢南徐州，改爲延陵鎮。十五年罷鎮，置潤州，城東有潤浦口，因以爲名。隋氏喪亂，杜伏威竊據其地，武德三年伏威歸化。六年輔公祏叛，復據其地。七年平公祏，依前置州。其城吳初築也，晉王恭爲刺史，改創西南樓名萬歲樓，西北樓名芙蓉樓。

州境：東西三百八里。南北一百九十里。

八到：西北至上都二千六百七十里。西北至東都一千八百一十里。東南至常州一百七十里。北渡江至揚州七十里。正南微西至宣州四百里。〔三〕

貢、賦：開元貢：雜藥，紋綾。賦：絲，紵，布。

管縣六：丹徒，丹陽，金壇，延陵，上元，句容。

丹徒縣，望。郭下。本朱方地，後名谷陽，春秋魯襄二十八年齊慶封奔吳，吳與之朱方，

聚族而居之，〔四〕富於其舊。後楚靈王使屈申圍慶封於朱方，克之，盡滅其族，卽此地。初，秦以其地有王氣，始皇遣赭衣徒三千人鑿破長隴，故名丹徒。

北固山，在縣北一里。下臨長江，其勢險固，因以爲名。蔡謨、謝安作鎮，並於山上作府庫，儲軍實。宋高祖云：「作鎮作固，誠有其緒，〔五〕然北望海口，實爲壯觀，以理而推，固宜爲顧。」江今闊一十八里，春秋朔望有奔濤，魏文帝東征孫氏，臨江嘆曰：「固天所以限南北也。」

蒜山，在縣西九里。山臨江絕壁，晉安帝時，海賊孫恩至丹徒，戰卒十萬，率衆登山，鼓譟動地，引陣南出，欲向京城。時宋武帝衆無一旅，率所領橫擊，大破之。山多澤蒜，因以爲名。

氏父山，〔六〕在縣西北十里。晉破苻堅，獲氏賊，置此山下，因以爲名。今土俗亦謂之金山。

獸窟山，一名招隱山，在縣西南九里。卽隱士戴顓之所居也。

東浦，亦謂之潤浦，在縣東二里，〔七〕北流入江。隋置潤州，〔八〕取此浦爲名也。

永興寧陵，在縣東南三十五里。宋武帝追尊曰孝皇帝，諱翹，初仕郡，爲功曹。

丹陽縣，望。西北至州六十四里。本舊雲陽縣地，〔九〕秦時望氣者云有王氣，故鑿之以敗其

勢，截其直道，使之阿曲，故曰曲阿。武德五年，曾於縣置簡州，八年廢。天寶元年，改爲丹陽縣。

劉繇城，在縣西南二百四十步。漢末，繇爲揚州刺史，揚州舊理壽春，已爲袁術所據。〔一〇〕故繇來建城，號令江南，衆數萬人。後孫策東略，繇奔豫章。

金山凌亭壘，在縣東四十七里。本蘇峻將管商攻略晉陵，郗道徽以此地東據要路，〔二〕北當武進，故遣督護李閔築此拒之。今置埭。

練湖，在縣北一百二十步，周迴四十里。晉時陳敏爲亂，據有江東，務修耕績，令弟諧遏馬林溪以溉雲陽，亦謂之練塘，溉田數百頃。

新豐湖，在縣東北三十里。晉元帝大興四年，晉陵內史張闔所立。舊晉陵地廣人稀，且少陂渠，田多惡穢，闔創湖成溉灌之利。初以勞役免官，後追紀其功，超爲大司農。

南齊宣帝休安陵，在縣北二十八里。高帝父也，追尊爲宣皇帝。

高帝道成泰安陵，在縣口三十二里。〔三〕

武帝隕景安陵，在縣東二十二里。〔三〕

景帝道生永安陵，在縣東北二十六里。明帝父也，追尊爲景皇帝。

明帝鸞興安陵，在縣東北二十四里。

梁文帝順之建陵，在縣口二十五里。武帝父也，追尊爲文皇帝。

武帝衍修陵，在縣東三十一里。貞觀十一年，詔令百步禁樵采。

簡文帝綱莊陵，在縣東二十七里。

金壇縣，緊。西北至州一百四十里。本漢曲阿縣地，隋於此置金山府。隋末亂離，鄉人自

立爲金山縣，武德八年廢。垂拱二年又置縣，以婺州有金山，改名金壇。

延陵縣，緊。東至州一百里。晉太康二年分曲阿之延陵鄉置延陵縣，蓋因季子以立名也。

又漢地理志，季子所居在今毗陵，本名延陵，至漢始改，然今縣北見有其祠，或當時采地所及，其地亦曰連陵。

茅山，在縣西南三十五里。三茅得道之所，事具仙經，不錄。

古神亭，在縣西北二十五里。初，孫策與太史慈遇於神亭，卽此地也。吳志曰：「太史

慈渡江到曲阿，見劉繇，會孫策至，繇使慈覘輕重，獨與一騎卒遇於神亭。策從騎十二，皆

韓當、宋謙、黃蓋輩也，慈便前鬪，策刺慈馬，得慈項上手戟，慈亦得策兜鍪，會兩家兵騎

來赴，遂各解散。後策獲慈，解縛捉手曰：「寧識神亭時邪？是時卿得我，如何？」慈曰：「未

可量也。」策乃大笑。

上元縣，緊東北至州一百八十里。本金陵地，秦始皇時望氣者云：「五百年後，金陵有都邑之氣。」故始皇東遊以厭之，改其地曰秣陵，塹北山以絕其勢。及孫權之稱號，自謂當之。孫盛以爲始皇建於孫氏四百三十七載，考其曆數，猶爲未及。晉之渡江，乃五百二十六年，遂定都焉。隋開皇九年平陳，於石頭城置蔣州，以江寧縣屬焉。武德三年，杜伏威歸化，改江寧爲歸化縣。九年，改爲白下縣，屬潤州。貞觀九年，又改白下爲江寧。至德二年，於縣置江寧郡，乾元元年改爲昇州，兼置浙西節度使。上元二年廢昇州，仍改江寧爲上元縣。

鍾山，在縣東北十八里。按輿地志，古金陵山也，邑縣之名，皆由此而立。吳大帝時，蔣子文發神異於此，封之爲蔣侯，改山曰蔣山。宋復名鍾山。梁武帝於西麓置愛敬寺，江表上已常遊於此，爲衆山之傑。

覆舟山，在縣東北一十里，鍾山西足地形如覆舟，故名。宋元嘉中改名玄武山，以爲樂遊苑。初，桓玄作亂，使卞範之屯覆舟山西，粟餘二萬。宋高祖率義師食畢，棄其餘糧，躬先士卒以擊之，範之等一時土崩。

牛頭山，在縣南四十里。山有二峯，東西相對，名爲「雙闕」。晉氏初過江，無闕，王導指山鑿兩峯，卽此，名天闕山。

方山，在縣東南七十里。秦鑿金陵以斷其勢，方石山堍，居偃切。〔二〕是所斷之處也。

三山，在縣西南五十里。〔三〕晉王濬伐吳，宿於牛渚，部分明日前至三山，卽此也。

四望山，在縣西北八里。晉溫嶠伐蘇峻於四望山，築壘以逼賊是也。

蔡洲，在縣西十二里江中。晉盧循作亂，戰士十餘萬，舟艦數百里，連旗而下。宋高祖登石頭以望循軍，初循引向新亭，公顧左右失色。既而迴泊蔡洲，公曰：「此成擒耳。」俄而循大敗而走。

淮水，源出縣南華山，在丹陽、湖孰兩縣界，西北流經秣陵、建康二縣之間入於江。初，王敦搆亂，王導憂將覆族，使郭璞筮之，曰：「淮水絕，王氏滅。」卽此淮也。

玄武湖，在縣北十里。周迴二十五里。

婁湖，縣東南五里。吳張昭所創，溉田數十頃，周迴七里。昭封婁侯，故謂之婁湖。宋時爲苑。

晉故臺城，在縣東北五里。成帝時，蘇峻作亂，焚燒宮室都盡，溫嶠以下咸議遷都，惟王導固爭不許。咸和六年，使王彬營造，七年帝遷於新宮，卽此城也。

揚州故理，〔三〕在縣東百步。後漢末又理壽春。劉繇爲揚州刺史，始移理曲阿。吳長沙桓王孫策定江東，置揚州於建業，其州廡王敦及王導所創也，後會稽王道子於東府城領

州，〔三〕故亦號此爲西州。及隋平陳，又於石城置蔣州，移揚州於江北之江都焉。

丹陽郡故城，在縣東南五里。初爲丹陽內史，後改爲尹。

石頭城，在縣西四里。卽楚之金陵城也，〔三〕吳改爲石頭城，建安十六年，吳大帝修築，

以貯財寶軍器，有戍，吳都賦云「戎車盈於石城」，是也。諸葛亮云「鍾山龍盤，石城虎踞」，〔四〕言其形之險固也。

秣陵故縣，在縣東南四里。本金陵地也，秦改爲秣陵。

湖孰故縣，在縣東南七十里。

越城，在縣南六里。本東甌越王所築也。吳王濞敗，先趨此城，後保丹徒。郭璞行於

途中，贈白衣人袴褶，亦此城也。

建康故城，在縣南三里。建安中改秣陵爲建業，晉復爲秣陵，孝武帝又分秣陵水北爲

建業，〔三〕避愍帝諱，改名建康。

東府城，在縣東七里。其地西則簡文帝爲會稽王時邸第，東則丞相會稽王道子府。謝

安薨，道子代領揚州，仍前府舍，故稱爲東府，而謂揚州廡爲西州。謝惠連祭冥漠君文，卽

因修此府之城牆所爲也。

輔公柝城，在縣東七里。其地本齊文惠太子苑地也，公柝構亂，築以爲城。其年，公

輔公柝城，在縣東七里。其地本齊文惠太子苑地也，公柝構亂，築以爲城。其年，公

拓平，城遂毀廢。

賀若弼壘，在縣北二十里。隋平陳，弼過江，於蔣山龍尾築壘。

韓擒虎壘，〔三六〕在縣西四里。隋平陳樹碑，其文，薛道衡之詞。武德七年，趙郡王孝恭

平輔公祏，樹碑紀功，與此碑相對，李百藥之詞。

吳大帝蔣陵，在縣北二十二里。

晉元帝睿建平陵、明帝紹武平陵、成帝衍興平陵，並在縣北六里雞籠山。

康帝岳崇平陵，在縣東北二十里蔣山西南。

哀帝丕安平陵，在縣北六里雞籠山南。

簡文帝昱高平陵、孝武帝昌明隆平陵、安帝德宗休平陵、恭帝德文沖平陵，並在縣東北

二十里蔣山西南。

宋武帝劉裕初寧陵、文帝義隆長寧陵，並在縣東北二十二里蔣山東南。

孝武帝駿景寧陵，在縣西南四十里巖山。

明帝彧高寧陵，在縣北十九里幕府山東南。

陳武帝霸先萬安陵，在縣東三十八里方山西北。貞觀十一年，詔百步內禁樵采。

文帝蒨永寧陵，在縣東北四十里蔣山東北。

宣帝項顯寧陵，在縣南四十里牛頭山西北。

梁昭明太子安陵，〔三七〕在縣東北五十四里查礪山。

晉王導墓，在縣西北十四里幕府山西。

謝安墓，在縣東南十里石子岡北。

句容縣，緊。東北至州二百里。漢舊縣也，晉元帝興於江左，為畿內第二品縣。縣有茅

山，本名句曲，以山形似「己」字，故名句曲；有所容，故號句容。

赤山湖，在縣南三十五里。

茅山，在縣東南六十里。

竹里山，在縣北六十里。王塗所經，塗甚傾險，行者號為翻車峴。山閒有長澗，高下深

阻，舊說云似洛陽金谷。宋武帝初起，自京口至江乘，破桓玄將吳甫之於竹里，移檄京

師，即此處也。

銅冶山，在縣北六十五里。出銅鉛，歷代采鑄。

常州，晉陵。緊。開元戶九萬六千四百七十五。〔三八〕鄉一百八十七。元和戶五萬四千七百六

十七。

禹貢揚州之地。春秋時屬吳，延陵季子之采邑。漢改曰毘陵，晉東海王越謫於毘

陵。〔元〕元帝以避諱，改爲晉陵郡，宋、齊因之。隋開皇九年平陳，廢郡，於常熟縣置常州，因縣爲名。後割常熟縣入蘇州，移常州理於晉陵縣。隋亂陷於寇境，武德七年平，仍舊置常州。

州境：東西二百二十二里。南北二百九十里。

八到：西北至上都二千八百四十五里。西北至東都一千九百八十里。東南至蘇州一百九十里。西南至古宣州

五百里。正南微西至湖州私路三百里。西北至潤州一百七十里。

貢、賦：開元貢：細紵，紅紫二色絛布。〔三〇〕紙六十張。賦：紵布。〔三一〕

管縣五：晉陵，武進，江陰，無錫，義興。

晉陵縣，望。郭下。本春秋時延陵，漢之毘陵也，後與郡俱改爲晉陵。季札所居也，墓

在本縣北七十里申浦之西。

武進縣，望。郭下。吳大帝改丹徒爲武進，晉武帝復改武進曰丹徒，別置武進縣於丹陽

縣東五十里。〔三二〕梁武帝改武進爲蘭陵，入晉陵。〔三三〕垂拱二年，又析晉陵西界立武進縣於

州理。

江陰縣，緊。東南至州五十里。〔三四〕本漢毘陵縣之漑陽鄉，〔三五〕晉太康二年置漑陽縣，梁

敬帝置江陰縣、郡。隋開皇九年罷郡，縣屬常州。

無錫縣，望。西北至州九十六里。漢舊縣也。東三十九里，有梅里山，吳太伯葬處。

義興縣，繁。北至州一百二十里。本漢陽羨縣，故城在荆溪南。晉惠帝時，妖賊石冰寇亂

揚土，縣人周玘創義討冰，割吳興之陽羨并長城縣之北鄉爲義興郡，以表玘功。隋開皇九年平陳，廢郡爲義興縣。

荆溪，是周處斬蛟處。

蘇州，吳郡。繁。開元戶六萬八千九十三。鄉一百一十八。元和戶十萬八百八。

禹貢揚州之地。周時爲吳國。太伯初置城，在今吳縣西北五十里，至闔閭遷都於此。後爲越所并，楚滅越而封黃歇於吳。秦置會稽郡二十六縣於吳。項羽初起，殺會稽太守殷通，卽此也。漢亦爲會稽郡。後漢順帝永建四年，陽羨令周喜山陰令殷重上書，求分爲二郡，遂割浙江以東爲會稽，浙江以西爲吳郡。孫氏創業，亦肇跡於此。歷晉至陳不改，常爲吳郡，與吳興、丹陽號爲「三吳」。隋開皇九年平陳，改爲蘇州，因姑蘇山爲名。山在州西四十里，其上闔閭起臺。外郭城，云是伍胥所築，周迴四十七里。

州境：東西四百四十一里。南北四百九十八里。

八到：西北至上都三千三十里。西北至東都二千一百七十里。南至杭州三百七十里。正南徽西至湖州二百一十里。東北至海三百三十里。西北至常州一百九十里。

貢、賦：開元貢白石脂，蛇牀子。賦：紵，布。元和貢絲葛十匹，白石脂三十斤，蛇牀子三升。

管縣七：吳，長洲，嘉興，海鹽，常熟，崑山，華亭。

吳縣，望。郭下。本吳國，闔閭所都，秦置縣。

太湖，在縣西南五十里。禹貢謂之震澤，周禮謂之具區。湖中有山，名洞庭山。

虎丘山，〔四三〕在縣西北八里。吳越春秋云闔閭葬於此，秦皇鑿其珍異，〔四三〕莫知所在，

孫權穿之，亦無所得。其鑿處，今成深澗。

松江，在縣南五十里，經崑山入海。左傳云「越伐吳，軍於笠澤」，卽此江。

長洲縣，望。郭下。本萬歲通天元年析吳縣置，取長洲苑爲名。苑在縣西南七

十里。

嘉興縣，望。北至州一百四十七里。本春秋時長水縣，秦爲由拳縣，漢因之。吳時有嘉禾

生，改名禾興縣，後以孫皓父名，改爲嘉興縣也。

海鹽縣，上。西北至州一百二十七里。本秦縣，漢因之。其後縣城陷爲柘湖，移於武原鄉。

後又陷爲當湖，移置山旁。隋開皇九年廢縣，北屬杭州，武德七年地入嘉興。開元五年，刺

史張廷珪又奏置。〔四四〕

常熟縣，緊。南至州一百里。本漢吳縣地，梁大同六年置常熟縣，武德七年移理海鹽虞

城〔四四〕今縣是也。

崑山縣，緊。西至州八十里。本秦、漢婁縣，其城吳子壽夢所築。梁分置信義縣，又分信

義置崑山縣，因縣有崑山，故取名焉。

華亭縣，上。西至州二百七十里。天寶十年，吳郡太守趙居貞奏割崑山、嘉興、海鹽三

縣置。

華亭谷，在縣西三十五里。陸遜、陸抗宅在其側〔四六〕。遜封華亭侯。陸機云「華亭鶴

唳」，此地是也。

杭州，餘杭。上。開元戶八萬四千二百五十二。鄉一百八十八。元和戶五萬一千二百七十六。

禹貢揚州之域。春秋時為吳、越二國之境。其地本名錢塘，史記云「秦始皇東游，至錢

塘〔四七〕，臨浙江」，是也。漢屬會稽，吳志注云「西部都尉理所」。陳禎明中置錢塘郡，隋平

陳，廢郡為州〔四八〕。

州境：東西五百五十四里。南北八十九里。

八到：西北至上都三千四百里。西北至東都二千五百四十里。西南至睦州三百一十五里。東南取浙江至越州

一百三十里〔四九〕。西至歙州四百七十里。西北至宣州四百九十六里。東北至浙江入海處約一百里。北至蘇州三百七

十里。

貢、賦：開元貢：黃藤紙，橘，黃連，緋綾，紋紗。賦：紵布。元和貢：白編綾十二匹。

管縣八：錢塘，餘杭，臨安，富陽，於潛，鹽官，新城，唐山。

錢塘縣，緊。郭下。本漢舊縣也。錢塘記云：「昔州境逼近海，縣理靈隱山下，今餘

址猶存。郡議曹華信乃立塘以防海水，募有能致土石者卽與錢。及塘成，縣境蒙利，乃遷理此地，於是改爲錢塘。」按華信漢時爲郡議曹，據史記，「始皇至錢塘，臨浙江」，秦時已有此名，疑所說爲謬。隋平陳以後，縣頻遷置，貞觀四年定於今所。

靈隱山，在州西北十七里。

界石山，在州西南四十九里。

浙江，在縣南一十二里。莊子云浙河，卽謂浙江，蓋取其曲折爲名。江源自歙州界東北流經界石山，又東北經州理北，又東北流入於海。江濤每日晝夜再上，常以月十日、二十五日最小，月三日、十八日極大，小則水漸漲不過數尺，大則濤湧高至數丈。每年八月十八日，數百里士女，共觀舟人漁子泝濤觸浪，謂之弄潮。

餘杭縣，緊。東南至州七十里。本吳地。吳興記云：「秦始皇二十七年，將上會稽，塗出

此地，因立爲縣，舍舟航於此，仍以爲名。」

由拳山，晉隱士郭文舉所居。傍有由拳村，出好藤紙。